

No Servus, Diener und Habe die Ehre!

Etze kummt dos

Nej su wos

vu Sömde, n 24. September 2022



Giselheid (Heidi) Staffa

Mei Lieblingsbichl

An Mundortkreise tun mr jo ömmr wos zu enn vurgegahnen Thema drzähl'n. Und wal unse „Vurturnerin“ su a Bichrnorr ös, hott'n mr ou amoul dos Thema „Mei Lieblingsbichl“. Die hout dann obnteuerliche Geschicht'n azu gebrocht, wie se nouch bestimmtn Bichrn grodezu uf de Johd gegang'n ös. Obr ihre einklich'n Lieblingsbichr wär'n herich die, die se salbr rausgegahn hout – de Märchn- und Gedichtbicher vu ihrn Aldrn und s Gablinzr Wertrbuch und a Rezeptbichl mit Familienrezeptn.

Uf suwos kon ich natierlich ne zorickegreifn und a tirektes Lieblingsbichl ho ich ou ne. Obzwor ich ömmr sehr garne gelasn ho, hottsch ock oubds an Bette Zeit drzune. Und dou ho ich dann ock a Toschnbichl haln kenn und ou ock hichstns drei Seitn geschofft. On libstn worn mr Gesellschaftsromane vu frieher, su öma 1900 röm. De gruße Waltliteratur und dramatisches Zeugs tut zun An-Bette-Lasn suwiesu ne su gutt taugn.

Nu wor mr dos Heidi-Buch vu dr Johanna Spyri wiedr amoul ei de Hände gekumm. Dos ös einklich a Kindrbuch, wor obr herich ou fr die gedocht, „die Kindr garne hon“. Und s ös, seitdan s 1880 rausgekumm wor, bös heute ömmr a röchtschr Klassiker gewast. Ich ho s noch amoul gelasn und s wor wiedr sehr schiene. „Dos Heidi“ – su word s immr genannt – kömmt of die Olm zun Grußvotr, wal de Tante, die dos Waisnmadl bös douhie vrsorgt hotte, zun Galdvrdinn ei de Stodt gieht. Dar Grußvotr ös su a ahler Griesgrom, dan obr s Heidi mit sannr vrgniegtn oscholdich'n Natierlichkejt klejn bei klejne „uftaut“ und röchtsch glücklich macht.

Dann soll se nouch Frankfurt zu dar krankn Klara, dosse dan gelähmt'n Kinde a bössl Gesellschaft leistet und lasn und schreibn larnt. Und ou dorte, obzwor se s sehr nouch Drhejme zieht, tut se mit ihrer Natierlichkejt und Frehlichkejt die stornn Gesetze dr ebrn Gesellschaft geherich dorchanandr brengn. Wal se obr vur lautr Hejmwieh s Schloufwandln ofängt, dorf se schlisslich zun Grußvotr zoricke of de Olm. Etze tot dar gelähmt'n Klara de Freundin su ej'sn fahln, dosse de Heidi uf dr Olm ban Großvotr besuchn dorf und dorte zun Schlusse tatsächlich wiedr gesund word. Dos ös olles su labendsch geschriebn, dosses mich sehr zun Nouchdenkn gebrocht hout.

Alsdann, die Ort vu Bichrn ho ich halt garne gelasn. Ne, doß ich andr Zeug ne gelasn hätte, obr s hout jo gehejß'n: „Mei Lieblingsbichl“. Dou muss mr sich schlisslich dro haln.

Mejnt dr ne ou?
